

史部

政書

四庫家藏

綱領

白思無邪
謝語詩三百一言以蔽之白思無邪
程氏曰思無邪誠也

文獻通考(八)

山東畫報出版社



文献通考

江苏工业学院图书馆
藏书章

◎◎

〔元〕马端临
上海师范大学古籍研究所
华东师范大学古籍研究所

整理 撰



目 录

【卷第一】

中宫三垣 1

【卷第二】

二十八宿 18

【卷第三】

十二次度数 54

天汉起没 57

七曜 58

【卷第四】

瑞变各星及云气名状(瑞星 星杂变 流星 妖星 客星

云气 十煇 杂气) 76

天变 89

【卷第五】

日食(周至东汉) 94

【卷第六】

日食(魏至宋) 119

史部

文
献
通
考

象
纬
考

○目
录



【卷第七】

日变(日辉 日晕) 139

【卷第八】

月食月变(月辉 月晕) 157

【卷第九】

彗 171

【卷第十】

月五星凌犯(秦至魏) 193

【卷第十一】

月五星凌犯(晋至隋) 210

【卷第十二】

月五星凌犯(月犯五纬 唐至宋英宗) 234

【卷第十三】

月五星凌犯(月犯五纬 宋神宗至宁宗) 257

杂星变 269

【卷第十四】

流星陨(周至宋真宗) 277

【卷第十五】

流星陨(宋仁宗至宁宗) 300



【卷第十六上】

星昼见 314

【卷第十六下】

五星聚舍 326

【卷第十七】

瑞星 343

客星 345

云气 虹霓 350

史部

文
献
通
考

象
纬
考

○
目
录



卷 第 一

中 宫 三 垣

《汉·天文志》曰：凡天文在图籍昭昭可知者，经星常宿中外官凡一百十八名，积数七百八十三星，皆有州国官宫物类之象。其伏见早晚，邪正存亡，虚实广狭（孟康曰：“伏见早晚，谓五星也。日月五星下道为邪。存谓列宿不亏也，亡谓恒星不见。虚实，若天牢星实则囚多，虚则开出之属也。阔狭，若三台星相去远近也。”），及五星所行，合散犯守，陵历斗食（孟康曰：“合，同舍也。散，五星有变则精散为祲星也。犯，七寸以内光芒相及也^[1]。陵，相冒过也。食，星月相凌，不见者则所食也。”韦昭曰：“自下往触之曰犯，居其宿曰守，经之为历，突掩为凌，星相击为斗也。”），彗孛飞流，日月薄食（张晏曰：“彗所以除旧布新也。孛气似彗。飞流谓流星也。”孟康曰：“飞，绝迹而去。流，光迹相连也。日月无光曰薄”。京房《易传》曰“日月赤黄为薄。或曰不变而食曰薄。”韦昭曰：“气往迫之为薄，亏毁曰食也。”），晕适背穴，抱珥重蜺（孟康曰：“晕^[2]，日旁气也。适，日之将食先有黑之变也。背，形如背字也。穴多作镞，其形如玉镞也。抱，气向日也。珥，形点黑也。”如淳曰：“晕读曰运。重或作虹。蜺读曰啮。螭蜺谓之重，表云雄为重，雌为蜺。凡气在日上为冠为戴^[3]，在旁直对为珥，在旁如半环向日为抱，向外为背。有气刺日为镞。镞，挟伤也。”），迅雷风祲，怪云变气：此皆阴阳之精，其本在地，而上发于天者也。政失于此，则变见于彼，犹景之象形，乡之应声（师古曰：“乡读曰响。”）。是以明君睹之而寤，飭身正事，思其咎，谢其过，则祸除而福至，自然之符也。

《晋·天文志》曰：“张衡云：文曜丽乎天，其动者有七，日月五星是



也。日者，阳精之宗；月者，阴精之宗；五星，五行之精。众星列布，体生于地，精成于天^[4]，列居错峙，各有攸属。在野象物，在朝象官，在人象事^[5]。其以神著^[6]，有五列焉，是为三十五名。一居中央，谓之北斗。四布于方各七，为二十八舍。日月运行，历示吉凶，五纬缠次，用告祸福。中外之官，常明者百有二十四，可名者三百二十，为星二千五百，微星之数盖万一千五百二十。庶物蠢蠢，咸得系命。不然，何得总而理诸？”后武帝时，太史令陈卓总甘、石、巫咸三家所著星图，大凡二百八十三官，一千四百六十四星，以为定纪。今略其昭昭者，以备天官云。”

中宫

北极紫微宫

中元北极紫微宫，北极五星在其中。大帝之座第二珠，第三之宫庶子居，第一号曰为太子，四为后宫五天枢（一云，第三明者帝之居，第四明曰四庶子，最小第五天之枢）。左右四星是四辅。天一、太一当门路，左枢、右枢夹南门，两面营卫一十五。上宰、少尉两相对，少宰、上辅次少辅，上卫、少卫次上丞。后门东边大赞府，门西唤作一少丞。以次却向前门数^[7]，阴德门里两黄聚。尚书以次其位五，女史、柱史各一户，御女四星五天柱。大理两星阴德边。勾陈尾指北极颠，勾陈六星六甲前，天皇独在勾陈里，五帝内座后门是。华盖并杠十六星，杠作柄象华盖形，盖上连连九个星，名曰传舍如连丁。垣外左右各六珠，右是内阶左天厨。阶前八星名八谷。厨下五个天棓宿。天床六星左枢在。内厨两星右枢对。文昌斗上半月形，希疏分明六个星。文昌之下曰三公，太尊只向三公明。天牢六星太尊边。太阳之守四势前。一个宰相太阳侧，更有三公、相西边，即是元戈一星圆。天理四星斗里暗，辅星近著开阳淡（一本云，文昌之上三师名^[8]。天牢六星四势前，更有三公、相西偏^[9]，即是太阳一星圆。天理四星斗里暗，辅星近著开阳淡）。北斗之宿七星名^[10]，第一主帝名枢精，第二第三璇、玑是，第四名权第五衡，开阳、摇光六、七名。



北极五星，在紫微宫中。一名天极，一名北辰。其纽星，天之枢也。天运无穷，三光迭耀，而极星不移。故曰“居其所而众星共之”。第一星主月，太子也。第二星主日，帝王也，亦为太乙之座，谓最赤明者也。第三星主五星，庶子也。北极五星最为尊也。中星不明，主不用事。右星不明，太子忧也。其第四星为后宫，第五星为天枢。张衡云，二星并为后宫。北极五星明大则吉，变动则忧。抱极枢四星曰四辅，所以辅佐北极而出度受政也。张衡云：抱极之细星也，为辅臣之位，主赞万机。小而明，吉；大明及芒角，臣逼君；暗则官不理。天乙一星，在紫宫门右星之南，天帝之神也，主战斗，知人吉凶者也。太乙一星，在天乙南相近，亦天帝神也，主使十六神，知风雨、水旱、兵革、饥馑、疾疫、灾害所生之国也。张衡云，天乙逼阊阖外，其占，明而有光，则阴阳和合，万物成，人主吉；不然反是。太乙占与天乙略同。紫微垣十五星，其西蕃七，东蕃八，在北斗之北。一曰紫微，大帝之座也，天子之常居也，主命、主度也。一曰长垣，一曰天营，一曰旗星，为藩卫，备藩臣也。宫阙兵起，旗星直，天子出，自将宫中兵。张衡云，紫微垣十五星，东藩八，西藩七。其东藩近阊阖门，第一星为左枢，第二星为上宰，第三星为少宰，第四星为上辅，第五星为少辅，第六星为上卫，第七星为少卫，第八星为少丞。其西藩近阊阖门，第一星为右枢，第二星为少尉，第三星为上辅，第四星为少辅，第五星为上卫，第六星为少卫，第七星为少丞。皆以明大有常则吉，若盛明，则内辅盛也。宫垣直而明，天子将兵；开则兵起。两藩开如门象^[11]，名阊阖门，有流星自门而出四野者，当有中使衔命，视其所适分野而论之也^[12]。阴德二星，在紫微宫内尚书之西，主施德者，其占，以不明为宜，明则新君践极。《隋志》曰：“尚书西二星曰阴德、阳德，主周急振抚。”又分为二坐星矣。门内东南维五星曰尚书，主纳言，夙夜咨谋，龙作纳言，此之象也。张衡曰，八座大臣之象，其占与四辅不殊。极东一星曰柱下史，主左右记君之过，星明则史直辞，不明反是。柱史北一星曰女史，妇人之微者，主传漏，故汉有侍史。张衡云，妇官也，主记宫中之事，其占与柱史同。御女四



星，在紫微宫内勾陈之北，八十一御妻之象也。其占，明则多内宠，不明则否。《晋志》谓之女御宫。天柱五星，在紫微宫门内，华盖杠左旁，近东垣北隅，法五行，主晦朔、昼夜之职。明正则吉，人安，阴阳调；不然则司历过。《隋志》云：建政教，立图法之府也。常以朔望日垂禁令于天柱，以示百司。《周礼》以正岁之月，示法象魏，此之谓也。大理二星，在紫微门内，次近阴德，决狱之官。星明则刑宪平，不明则冤酷深。勾陈六星，在紫微宫华盖之下。《隋志》云，后宫也，大帝之正妃也，大帝之常居也。张衡云，大帝所居之宫也，亦将军之象也。星明则吉，暗则人主恶之。勾陈口一星，曰天皇大帝，其神曰曜魄宝，主御群灵，乘万机神图也。其星隐而不见，则为灾。六甲六星，在紫微宫内华盖杠左傍，分掌阴阳，纪时节。明则阴阳和，不明则寒暑易节。五帝内座五星，在华盖下，勾陈上，斧戾之象，所以备宸居者。明正则吉，变动则灾凶。《隋志》云，客星犯紫微宫中座，大臣犯主。华盖七星，其杠九星，合十六星，在勾陈上，正当大帝，所以覆蔽大帝之座也。明正则吉，倾动则凶。传舍九星，在华盖上，近河，宾客之馆，主胡人人中国。客星守之，备奸使，亦曰胡兵起。内阶六星，在文昌北，天皇之陛也。明，吉；倾动，凶。紫微东垣北维外六星曰天厨，天子百官之厨也。见，吉；不见，凶。八谷八星，在紫微西藩之外，五车之北。其八星，一主稻，二主黍，三主大麦，四主小麦，五主大豆，六主小豆，七主粟，八主麻子。明则八谷皆成，暗则不熟。一星不见，则八谷不登；八星不见，则国人糊口。天棓五星，在女床东北，天子先驱，所以御难也。不明则国兵起。一曰主争讼。明，大凶小吉。天床六星，当阖闾门外，主天子寝舍，解息燕休之处。星正大吉，君有庆；倾则人主不安。一云在宫门外，听政之象也，为寝舍也，暗凶。内厨两星，在紫微垣外西南角，主六宫之内饮食府也，一云主后妃夫人与太子饮宴^[13]。居常无咎，有犯、守，凶。文昌六星，在北斗魁前，天之六府也，主集计天道。一曰上将、大将军，建威武；二曰次将^[14]、尚书，正左右；三曰贵相、太常，理文绪；四曰司禄、司中、司隶，赏功进爵；五曰司命、司怪、太史，主灭咎；六曰



司寇、大理、佐理宝。所谓一者，起北斗魁前近内阶者也。明润，大小齐，天瑞臻。张衡云，其占，黄润光明，万人安，大小均，天瑞降；青黑细微，多所害；摇动移徙^[15]，大臣忧。金火守人，兵兴。孛犯，国乱。一曰文昌动，则三公受诛，后崩，灾福与三公同。三公三星，在北斗柄东，又三公星在北斗魁西^[16]，并为太尉、司空、司徒之象。主燮理阴阳，弼君机务。其星移徙，不吉；居，常安。金火守之，三公有凶。《隋志》曰，杓南三星及魁第一星皆曰三公，宣德化，调七政，和阴阳之官也。太尊一星，在中台之北，贵戚也。巫咸云，圣公之象，居常为定，不见则凶。金犯守为灾，贵贱将败者也。天牢六星，在北斗魁下，贵人之牢也，主愆过禁暴淫，与贯索同占。太阳守一星，在相西，大将大臣之象也，主戒不虞，设武备也。非其常，兵起；明，吉；暗，凶；移徙，大臣诛。势四星，在太阳守西北^[17]，刑余人而用事者也。不明，吉；明即阉官擅权。相一星，在北斗南。《隋志》曰，相者，总领百官，而掌邦教，以佐帝王，安邦国，集众事也。明，吉。玄戈一星，在招摇北，一曰天戈也。芒角大而动，则四夷兵起。其占与梗河相类。北斗魁中四黑星，为贵人之牢，曰天理。明及摇动与有星者，为贵人下狱。北斗七星，辅一星，在太微北，七政之枢机，阴阳之本元也。故运乎天中，而临制四方，以建四时，而均五行也。魁四星为璇玑，杓三星为玉衡。又象号令之主，又为帝车，取乎运动之义也。又魁第一星曰天枢，二曰璇，三曰玑，四曰权，五曰玉衡，六曰开阳，七曰摇光。一至四为魁，五至七为杓。枢为天，璇为地，玑为人，权为时，玉衡为音，开阳为律，摇光为星。石氏云，第一曰正星，主阳德，天子之象也。二曰法星，主阴刑，女主之位也。三曰令星，主祸害也。四曰伐星，主天理，伐无道。五曰杀星，主中央，助四旁，杀有罪。六曰危星，主天仓五谷。七曰部星，亦曰应星，主兵。又云，一主天，二主地，三主火，四主水，五主土，六主木，七主金。又曰，一主秦，二主楚，三主梁，四主吴，五主赵，六主燕，七主齐。辅星附乎开阳，所以佐斗成功也。又曰主危正，矫不平，又曰丞相之象也。七政星明则国昌，不明则国殃。斗旁欲多星则安，斗中少星则人怨上，天下



多讼法者。无星二十日有赦^[18]。辅星明而斗不明，臣强主弱；斗明辅不明，主强臣弱也。杓南三星及魁第一星皆曰三公，宣德化，调七政，和阴阳之官也。张衡云：“若天子不恭宗庙，不敬鬼神，则魁第一星不明，或变色^[19]。若广营宫室，妄凿山陵，则第二星不明，或变色。若不爱百姓，聚兴征役，则第三星不明，或变色。若发号令，不顺四时^[20]，不明天道，则第四星不明，或变色。若废正乐，务淫声，则第五星不明，或变色。若不动农桑，不务稼穡，峻法滥刑，退贤伤政，则第六星不明，或变色。若不抚四方，不安夷夏，则第七星不明，或变色。”凡日、月晕连环，及斗、月晕，及摇动，兵起。其傍侧中小星多，则天下不安，人多怨。一云小星多则天下安，不然则国人散。五曜及客星守入皆凶，孛彗尤甚也。

右夹漈郑氏作《通志·天文略》言，汉晋诸志，所载诸星名数灾祥，丛杂难举。惟隋丹元子作《步天歌》，句中有图，言下见象，或丰或约，无余无失，故特取其歌，而于歌之后采诸家之言以备之。今所载其前则丹元子歌也，后则夹漈所取诸志以释之者也，其说亦略备矣。然《宋史·志》所载近代诸儒之说，则考订尤详，故又摭其所未备者，附见各段之末云。

《宋两朝天文志》：旧说皆以纽星正枢机，后祖暅之立仪测之，洎皇祐中，以铜仪管候之，其不动处犹在枢星之末一度余。

《朱子语录》曰：北辰乃天之北极，天如水车，北辰乃轴处，水车动而轴未尝动。又曰：北辰是那中间无星处些子不动，是天之枢纽。北辰无星，缘人要取此为极，不可无个记认，所以就其旁取一小星，谓之极星。问极星动否？曰极星也动，只是近那辰后虽动而不觉。今人以管去窥那极星，见其动来动去，只在管里面不动出去。向来人说北极便是北辰，皆只说北极不动，至本朝人方去推得是北极，只在北辰边头，而极星依旧动。

《宋两朝天文志》。太子星，去北极十五度，入心宿三度。四辅四星，去天枢各四度。勾陈六星，去极六度半，入壁宿五度。

天皇大帝星，去极八度半，入室宿十一度。 华盖七星杠九星距中大星，去极二十六度，入娄宿四度。 五帝内座五星距中大星，去极十二度半，入室宿六度。 六甲六星距南星，去极一十五度，入奎宿四度。 御女四星距西南星，去极一十三度半，入奎宿一度。 天柱五星距东南星，去极十三度半，入危宿初度。 尚书五星距西南星，去极一十九度，入尾宿十四度。 柱下史一星，去极十八度，入斗宿十三度。 女史一星，去极十七度半，入斗宿二度。 阴德二星距东星，去极十九度，入房宿二度。 大理二星距东星，去极二十三度半，入心宿五度。 天床六星距西南星，去极二十二度，入氏宿二度半。 紫微垣十五星：其左驂枢，去极二十七度半，入房宿一度；右驂枢，去极二十一度，入亢宿八度。 天乙一星，去极二十度半，入亢宿一度半。 太乙一星，去极二十一度，入亢宿一度。 内厨二星距西南星，去极十九度半，入轸宿十一度。 天厨六星距大星，去极二十四度，入井宿二十二度。 内阶六星距西南星，去极二十三度，入井宿二十六度。 八谷八星距西南星，去极三十一度半，入毕宿三度。 传舍九星距西第四星，去极二十八度半，入胃宿五度。 阁道六星距南星，去极四十八度，入奎宿四度半。 策一星，去极三十三度半，入壁宿五度。 钩九星距大星，去极二十四度，入危宿初度。 扶筐七星距南第一星，去极三十二度半，入斗宿六度。

北斗七星：天枢，去极二十三度半，入张宿十度；摇光去极三十五度，入角宿九度。 辅一星，去极三十度，入角宿三度。 天理四星距东南星，去极二十八度，入翼宿九度。 三公三星距东星，去极三十五度少，入角宿六度。 三师三星距西星，去极二十一度，入张宿初度半。 文昌六星距西南星，去极三十四度半，入柳宿二度半。

天牢六星距西北星，去极二十八度半，入张宿六度。 天相一星，去极三十三度，入轸宿四度。 势四星，去极三十一度，入翼宿二度。 天枪三星距大星，去极三十二度半，入氏宿初度。 天棓五星距南星，去极四十四度，入箕宿三度。



先公曰：古今志天文者，述天官星之名义，大略皆同。两朝《志》亦出入晋、隋二史，但此能言其去极若干度，入某宿若干度为异耳^[21]。

《宋中兴天文志》：坎，正北方也。北极不于坎乾而于艮丑，以艮东北万物之所，成终而所成始也。作历者逆推而上之，以至于数千百载，必得日月合璧，五星连珠，于建牛之次，然后用之，为历元，谓建牛艮丑分野，万物成终成始之地也。故北极则居其方，为天极。而七政则会其分，为历之元。当七政会其分之时，亦必缠运适当其方次，天道自然知者鲜矣，此其辨之。一曰北极第二星，最赤明者，星图谓之帝。而勾陈口中又为天皇大帝，非是。按巫咸《通元经宝镜图》：北极五星，勾陈六星，在紫极宫中，柰宫一而帝二也。此当辨。曰，贾逵、张衡、蔡邕、王蕃、陆绩皆以纽星为不动处。《晋志》谓“北辰为最尊者”是也。孔子曰，譬如北辰，居其所而众星共之。言于天象，为至尊。是于五星为第一，而《志》反以第五，倒置之甚，此当辨。夫不以纽星之居其所，众星共者为帝，而以从极之赤明者为帝，则异乎吾孔子所云，此当辨。北辰一星不为帝，而指勾陈口中星为天皇大帝，岂居其所非大，而不居其所为大乎。口中一星，即大帝之座，不当遂指为天皇大帝，遂以为耀魄宝，此当辨。《志》曰，北极五星，其纽星，天之枢也。第一星主月，太子也。第二星主日，帝王也，亦太乙之座，谓最赤明者也。第三星主五星，庶子也，非是。按《大象列星图》，亦以乙为太子，二为帝王，三为庶子，而余星则以为后宫。《乾象新书》所载传言，亦以一主月，为太子；二主日，为帝王；而三则以为主五行；四则以为主诸王；五则以为主庶子。核其说皆非是，而未暇辨。所辨者，日月五星各分所主，而非其义也。藉令必有所主，则主者惟帝耳，太子何得分主月，庶子又何得分主五星，而帝乃独主日乎？此当辨。《天官书》、《前汉志》及《春秋合诚图》曰，中宫天极星，其一明者太乙常居；旁三星三公，或曰子属。后勾四星，末大星正妃，余三星后宫之属也。《孝经援神契》曰，辰极横，后

妃四星从，端大妃光明。二说大略相类。然考之经观之象，则指三星为三公固不可，而又以三星为子属尤不可，且既以为三公，又以为子属，何自二其说乎？子属即旁二星耳，太子一，庶子一，岂又有子属乎？宫南三星曰三公内座，杓南三星及魁上三星曰三公，三孤后岂此又有三公乎？所谓后勾四星，勾曲抱极，《志》谓四辅星也。则言末大星正妃，余三星后宫之属者，与言后妃四星从，端大妃光明者，皆非是，此当辨。夫以四辅末大星为妃者，固非是，而《志》则曰，勾陈后宫也，大帝之正妃也，亦非是。勾陈实主六军，大司马。巫咸曰，主天子护军。即不当以为后宫，又不当以为正妃，此当辨。曰，然则北极五星之辨，如何闻之师云。天枢纽星，在四辅中者，是为天皇大帝，其神曰耀魄宝，此是也。而彼所指勾陈中一星为耀魄宝者，非也。故初一日帝；次二曰后；次三曰妃；次四曰太子，乃其赤明者也；次五曰庶子。因知中宫帝，当以孔子所称北辰为据，其精北极星，其神耀魄宝，太公望、閼天书不诬，此其辨之二。

又曰：极星之在紫垣，万神所宗，七曜、三垣、二十八宿，众星所拱，是北极为天文之正中。而自唐以来历家以仪象考测，则中国南北极之正，实去极星之北一度有半，此盖中原地势之度数也。

中兴更造浑仪，而太史局令丁师仁言：“临安府地势向南，于北辰极高下当量行移易。”局官吕臻言：“浑天无量行更易之制，若用于临安与天参合，移之他往必有差忒。”于此罢议。后十余年，邵澍铸仪，则果用临安北极高下为之。以今清台仪校之，实去极星四度有奇焉。若列星诸宿去极之度数，与赤道之远近，则清台一遵皇祐所测，无所更易。旧史已具，兹不复言。

太微宫

上元太微宫，昭昭列象在苍穹。端门只是门之中，左右执法门西东。门首皂衣一谒者，以次即是乌三公。三黑九卿公背傍，五黑诸侯卿后行。四个门西主轩屏，五帝内座于中正。幸臣、太子并从官，乌列帝后从东定。郎将、虎贲居左右，常陈、郎位居其后，常陈七星不相误，



郎位陈东一十五。两面宫垣十星布，左右执法是其数。宫外明堂布政官，三个灵台候云雨，少微四星西南隅，长垣双双微西居。北门西外接三台，与垣相对无兵灾。

太微垣十星，在翼、轸北。张衡云，天子之宫庭，五帝之座，十二诸侯府也。其外蕃，九卿也。一曰，轩辕为权，太微为衡。衡，主平也。《隋志》云，又为天庭，理法平辞，监升授德，列宿受符，诸神考节，舒情稽疑也。南蕃中二星间曰端门。东曰左执法，廷尉之象也。西曰右执法，御史大夫之象也。执法，所以举刺凶奸者也。左执法之东，左掖门也。右执法之西，右掖门也。东蕃四星：南第一曰上相，其北东太阳门也；第二星曰次相，其北中华东门也；第三星曰次将，其北东太阴门也；第四星曰上将，所谓四辅也。西蕃四星：南第一星曰上将，其北西太阳门也；第二星曰次将，其北中华西门也；第三星曰次相，其北西太阴门也；第四星曰上相，亦四辅也。东西蕃有芒及动摇者，诸侯谋天子也。执法移则刑罚尤急。月五星入太微轨道，吉；其所犯中座，成刑。谒者一星，在太微内右执法东北^[22]，主赞宾客也。不见，外国不宾服。谒者东北三星曰三公内座，朝会之所居也。张衡云，以辅弼帝者，其名与夹斗三公同。三公北三星曰九卿内座，主治万事，与天纪同占。九卿西五星曰内五诸侯，内侍天子，不之国也。辟雍之礼得，则太微诸侯明。内屏四星^[23]，在端门内，帝座南，近右执法。屏所以拥蔽帝庭也。执法主刺举，星明润，则君臣有礼。黄帝内座一星，在太微中，含枢纽之神也。天子动得天度，止得地意，从容中道，则太微五帝之座明以光。黄帝座不明，人主当求贤士以辅治；不然则夺势。又曰，太微五帝座小弱青黑，天子国亡。四帝内座四星，夹黄帝座。东方星，苍帝灵威仰之神也。南方星，赤帝赤熛怒之神也。西方星，白帝白招矩之神也。北方星，黑帝叶光纪之神也。张衡云，五帝同明而光，则天下归心；不然则失位。金火水入太微，若顺入轨道，伺其出之，所守之分，则为天子所诛也。帝座东北一星曰幸臣，主亲爱臣，明则幸臣用事，微细吉。太

子一星，在幸臣西，五帝座北，储贰之星。明而润，则太子贤；不然则否。金火守人，太子不废则为篡逆之事。从官一星，在太子西北，主从官。不见则帝不安，如常则吉。郎将一星，在郎位东北，所以为武卫。张衡云，今左右中郎将是也，大明、芒角，将恐不可当也。虎贲一星，在太微西蕃之外，上相之西，下台之南，静室旄头之骑官也。张衡云，主侍从之武臣也，与车骑同占。常陈七星，如毕状，在郎位北，天子宿卫虎贲之士，以设强毅也。星摇动，天子自出；明则武兵用；微则兵弱。郎位十五星，又云，二十四星，在帝座东北，一曰依乌，郎位也。周官之元士，汉官之光禄、中散骑、谏议、议郎、三署郎中，是其职也。张衡云，今之尚书郎也。欲其大小相均，光润有常，吉。《隋志》，郎位，主守卫也。其星明，大臣有劫主，又曰客犯上；其星不具，后死，幸臣诛。客星入之，大臣为乱。明堂三星，在太微西南角外，天子布政之宫也。明吉，暗凶。明堂西三星曰灵台，主观云物，察符瑞，候灾变也。占与司怪同。少微、长垣二座星，已释在张星之次矣。三台六星，两两而居，起文昌，列招摇太微。一曰天柱，三公之位也。在天曰三台，主开德宣符也。西近文昌二星曰上台，为司命，主寿；次二星，对轩辕，曰中台，为司中，主宗室；东二星，抵太微，曰下台，为司禄，主兵。所以昭德塞违也。又曰三台为天阶，太乙躔以上下。一曰泰阶，上阶上星为天子，下星为女主；中阶上星为诸侯三公，下星为卿大夫；下阶上星为士，下星为庶人。所以和阴阳而理万物也。其星有变，各以所主占之。君臣和集，如其常度。张衡云，色齐明而行列相类，则君臣和，法令平；不齐，为乖度。金火守人，兵起，彗孛尤甚也。

《宋两朝天文志》：太微十星：右执法，去极八十四度，入翼宿十二度半；左执法，去极八十六度，入轸宿初度半。 謁者一星，去极八十三度，入轸宿一度。 三公三星距东星，去极八十四度半，入轸六度。 九卿三星距西北星，去极七十五度，入轸七度。 内五诸侯五星距西星，去极七十度，入轸一度。 五帝座五星距中大星，去



极七十一度半，入翼十一度。内屏四星距西南星，去极八十度，入翼十度。太子一星，去极六十六度半，入翼十一度半。从官一星，去极六十四度半，入翼八度半。幸臣一星，去极六十六度半，入翼十五度。郎位十五星距西南星，去极六十度，入翼十八度。

郎将一星，去极四十七度半，入轸十一度。常陈七星距东星，去极五十一度半，入轸初度。虎贲一星，去极六十二度少，入翼二度。

《宋中兴天文志》曰：太微垣有五帝座，五帝内座又列乎紫宫，何也？曰五帝常居在太微而入觐乎紫宫，故有内座也。然则五帝何帝也？此《志》所谓灵威仰、赤熛怒、含枢纽、白招矩、叶光纪之神也。有天皇矣，而又有五帝何也？五帝，在天主五行，在地主五岳，分方主事，以辅天皇者。昔周公郊祀后稷以配天，斯北极紫微中宫天皇大帝也。而宗祀文王于明堂，以配上帝，则宫南太微五帝也。此《月令》明堂，所以分五宫，祀五帝也。

天市垣

下元一宫名天市，两扇垣墙二十二。当门六角黑市楼，门左两星是车肆。两个宗正四宗人，宗星一双亦依次。帛度两星屠肆前，候星还在帝座边。帝座一星常光明，四个微茫宦者星。以次两星名列肆，斗、斛帝前依其次，斗是五星斛是四。垣北九个贯索星，索口横者七公成。天纪恰似七公形，数著分明多两星。纪北三星名女床，此座还依织女傍。三光之象无相侵，二十八宿随其阴。水火木土并与金，以次别有五行吟。

天市垣二十二星，在房、心东北，主权衡，主聚众。一曰天旗庭，主斩戮之事也。市中星众润泽则岁实，星希则岁虚。荧惑守之，戮不忠之臣。又曰，若怒角守之者，臣杀主。彗星出，为徙市易都。客星入之，兵大起；出之，有贵丧。张衡云，天市明则市利急^[24]，商人无利；忽暗，则反是。市楼六星，在市中，临箕星之上，主司阖闾。明则吉，暗则市利不理也。《隋志》，市楼者市府也，主市价律度，其阳为